



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : f Tir Yimyim

ig tir_yimyim

yt tir yimyim

TAPAK 8

Modi aser Putin nati linük ana tsüngda taliba amalitepa inyaktsü bangjem

Gifty Jami-i India tenüng nung World Nomad Games nung shilem agi

VOL. XXIII ISSUE NO. 331 (ADOK 331) DIMAPUR KÜPTOKNÜ (SATURDAY) RONGJUI (SEPTEMBER) 12, 2026 ₹ 5.00



September 10, 2026 anogo, New Delhi nung RSS Chief Mohan Bhagwat den taoba Nagaland Chief minister aser Gujarat, Maharastra, Goa angh Dr. S. C. Jamir ajuruba mapang agiba noksa ka yangi angur. Tena ajuruba mapang Dr. S C. Jamir-i RSS lenir dang linük nung tamangba yimsü ajak kasasa akhümtsübuwa amshitsü nenshia metetdaksüogo. Tenatisa Naga yimten tebilemtsü koktettsü nüngdakba ken o nung shisalemsatepa liasü. RSS lenir ya tawa US aser Canada lima sema jajaba mapang India nung tamangba yimsü ajak sademsadema amangdaksür ta metetdakja liasü.

JFD volunteers-i sorkar office tem shibangtsü

Imphal, September 11, 2026 (Agencies): Manipur nung Campaign for Just and Fair Delimitation (JFD)-i September 11 nü state tesem balala nung sorkar office tem shibangtsüogo.

JFD-i base year 1951 nung ajemdaker Manipur nung National Register of Citizens (NRC) update asütsü akhanger.

Tanü JFD volunteers-i sorkar office aika shibangtsü aser parnoki "Don't attend office", "No NRC, No Census" aser "NRC base year should be 1951" poster tem amer lungkak ait.

Sorkar office tem shibanga aoba mapang police-i JFD volunteers asem apu.

Sorkar office tem shibangtsü osang angashiba sülen police tesem tonga ao aser office shibangtsüba dala raksar lapoktsü.

Anogo ishika tejakdang JFD-i September 11 nungi state ajungalen State aser Central government offices shibangtsütsü osang metetdakja liasü.

Parnokisa Manipur sorkar dang September 10 matongdang NRC update asüba mapa tenzükang ta Centre rongshitsü ayongzüka liasü.

Ajisüaka, iba mokdang kübok essential services, including education, water supply, electricity aser post offices madener ta parnokisa ashi.

Assam nung Opposition longjemtsü ayongzüker

Guwahati, September 11, 2026 (Agencies): Assam nung artists, writers, intellectuals aser tongtipang senso 200 temai Opposition party tem longjemer BJP sorkar anema noktaksü ayongzüko.

Assam nung yimtenren mapa asoshi tebilemtsü abener aser Opposition-i Assembly elections nung tamakok anguba süoki ia mebilemba aitsür ta Asom Nagarik Sanmilan-i metetdaksüogo.

Opposition-i election nung tamakok anguba kulitem bushitsü imlaa liasü. Opposition tanaben yanglushitsü aser nübortem den sendakteptsü teimla liasü saka ibaji meinyaker

ta Asom Nagarik Sanmilan-i ashi.

Taküm tzungluruwa mapang Upper Assam nung tüzümsüng timtem tulu atalokba atema Opposition-i teinyaktsü tim meinyak ta parnokisa aitsü.

Opposition-i külemi ola madokba ya parnok tsüngda obang meputep aser mepetmesü ajanga lir. Asenoki Congress mapang ochimashi nung temulung magütsütsüla kechiyong Centre aser Assam nung joko küm ter tema Congress sorkar mali arur. Tang nüngdakbaji BJP sorkari tim masü ketdangsüba aser ochimashi inyakba anema ola adoktsüba lir ta Asom Nagarik Sanmilan-isa metetdaksüogo.

METETDAKTSÜR

Iba osangkaket agiba aser ayokba sen magütsüba agi asüng September 13, 2026 anogo nungi tesem kar nung Tir Yimyim mangutsü. Iba atema tazüngertem dang kanga sasaba metetdaksür. Osang tejangja atema onok den tongtepratepangma .

- Yimozülur,
Tir Yimyim .

CM Rio-i Amit Shah dang Protected Area Permit (PAP) agientsü ayongzüker

Dimapur, September 11, 2026 (TYO): Chief Minister Neiphiu Rio-i Centre dang Nagaland nungi Protected Area Permit (PAP) agientsü atema shidi ka zülüogo.

CM Rio-i Union Home Minister Amit Shah dangi zülüba shidi nung Nagaland Legislative Assembly temepishiba agizüktsü indang shiogo.

NLA-i Centre dang Nagaland nungi PAP agienang ta ashitsü aser tesüiba nung ama inyaka aotsü bangzüng renemogo ta CM Rio-i ashi.

Iba temepishiba ya NLA züngsemtemi dang masü saka civil society organizations, kin teloktem, tourism den sendaktepa alirtem, entrepreneurs, shishilembar aser lanurtemi tebilemtsü abener ta paisa ashi.

PAP ajanga Nagaland-i India aser tanga linüktem den rongsenketzüng tsütsü sendaktepba aser inyaksangshi

nung tetsükdaktsü ajurur ta paisa Amit Shah dang ashi.

State sorkari iba tebilemtsü atema Centre den maneni jembia arur aser state Cabinet-ia PAP tanaben benokba anema bangzüng renemogo. Nagaland nung tapet inyakyim benoktsü mulunga lir aser iba nung Ministry of Home Affairs aser tanga agencies den amalitepa bendanger aruba atema technology-enabled systems amshitsü dena lir ta pai ashi.

Nagaland nung tensa süngiema kümogo aser ceasefire den yimjung maparen ajanga yimjung bener aruogo. Lanuputui education, entrepreneurship, tourism, sports, creative economy, innovation aser alima den shilem aginür anungji iba den apet mapa inyaktsü nüngdaker ta CM Rio-isa ashi.

Nagaland nung tourism ya rongsenketzüng tongshi

tongtipang ka kümogo saka PAP ajanga iba nung kanga kongshir. Nagaland nung tourism ajanga homestay operators, transport providers, artisans, musicians, artists, farmers aser food entrepreneurs meyrjang aika taküm mesür saka PAP ajanga parnoki timtem kanga ajurur ta CM Rio-isa shidi nung shia lir.

Centre-i tesem aika nungi Armed Forces (Special Powers) Act agienba ajanga Northeast security tensa tajungba akümba kuli sayur. Nagaland nung PAP magienba atema nübortemi ashishiteper aser jashir aser lanurtemi Nagaland bendanga amshir ama bilemer. Anungji Nagaland nungi PAP agientsü mepishir aser state sorkari MHA o tanga agency tem den külemi amalitepa iba dak sendakba maparen inyaka aotsü ta CM Rio-isa Union Home Minister Shah dang shiogo.

Nagaland nung Centre of Logistics Training for Excellence (COLTE) lapok

Dimapur, September 11, 2026 (TYO): Asia nung logistics training centre tulutiba aser linük nung centre of excellence tasembuba Nagaland nung lapokogo.

September 11, 2026 nü Nagaland Integrated Hub for Skills, Kushiabill, Dimapur nung Centre of Logistics Training for Excellence (COLTE) lapok.

COLTE ya Redington Foundation (the CSR arm of Redington Limited)-i corporate social responsibility mapa ka ama Logistics Sector Skill Council den yaritepa amenokogo.

Iba centre ajanga lanurtem industry den putepba skills sayutsü, parnok mapa angutsü lenmang lapoktsütsü aser India o alima nung maongkatem den sendakteptsü.

Iba training ya angati dang agütsütsü aser iba nung talidak aser chiyungsü angati densema lir. COLTE nung training agirtem mapa 100% angutsü.

"India nung logistics aser supply chain sector ya tarutsü nung kanga inloka aotsü asadangteta lir. Tashirtemi sayuba ajanga asen lanurtemi iba sector nung tajungtiba akümtsü maongka angutsü" ta Deputy Chief Minister, Planning & Transformation and National Highways, Nagaland T. R. Zeliang-i ashi.

"Naga nunger dak entrepreneurial tangatetba lir saka formal industry recognized skilling infrastructure maliba ajanga tangar memeneper. Iba centre lapokba ajanga Nagaland nungi lanur mashii kati warehousing, supply chain management aser logistics technology nung training agitettsü aser national certification ngua mapa inyaka otetttsü" ta TR Zeliang-isa ashi.

Logistics Sector Skill Council aser Zipaworld Innovative Private Limited tsüngda Memorandum of Understanding ya kanga tongtipang kechiyong iba ajanga international placement angutsü. Iba centre nung training agiba lanur kati India nung yimti tulutem nung mapa anguba dang masü saka alima jenjang nung inyaktettsü ta paisa ashi.

Nisung ka taküm nung sorkar mapa inyakbaji dang takok ka ama mezüngshitsüla. State sorkar revenue peria manguba ajanga senotsü khuret tulu lir ta pai ashi.

"Sorkar mapa angutsü dang mebilemi tanga lenmangtem bushitsüla. Kishi ka shibangdang kishi ajak shibangogo ta tezü matangtsüla. Iba centre nungi maongka agiang aser taküm nung temelenshi bener arung" ta TR Zeliang-isa lanurtem ayongzüker.

State sorkari Logistics Sector Skill Council, Redington Foundation aser Zipaworld den yaritepa training agiba lanur shia mapa ngudaktsütsü. Iba center ya model ka akümtsü aser tarutsü anogotem state kübok logistic areas nung ano lapoka aotsü amanger ta paisa shisem.

Logistics Sector Skill Council, Redington Foundation aser Zipaworld Innovation-i iba wadang asoshi Nagaland shimtetba atema tenüngsang agütsü aser iba ajanga state nung mapa manguba khuret ajema akümtsü imlaba metetdaksü.

Redington Group-i Chennai aser Hyderabad ama yimtitem nung quality center amenoka lir aser lanur aika nem training facilities agütsür. Tanü Nagaland-a iba national network nung adener aser iba ya Nagaland atema dang masü saka Northeast atema mezüngbuba lir ta paisa shisem.

"Nagaland nung skill

development ya training aser certificates agütsüba mapa ka dang mezüngshitsüla. Asenok indang nükjidongji skills tajungba kümdaktsütsü aser mapa ngudaktsütsü atema lir" ta MLA & Advisor Skill Development, Labour Employment Moatoshi Longkumer-i ashi.

"Tanü logistics sector kanga ainer aser transportation, warehousing, supply chain operations, distribution o sendaktepa aliba services asoshi training agiba nübotem nüngdaker. Northeast nung connectivity aser economic activity tajungba akümdang ibala skills kanga nüngdaker anungji asenoki asen lanurtem item maongka atema renema lidaktsütsü nüngdaker" ta pai ashi.

Nagaland atema mapa inyaktsüba ya kanga tongtipang lir. Asenoki skill development programs ya nisung kwika nem training agütsü ta masü saka training tembanger parnoki kechi inyaker ta asüba nung asadangtsüla ta Moatoshi-i ashi.

COLTE indang tebilemtsü ya classroom training adena oa lir. Iba nung up skilling aser re skilling, industry visits & practical training, training of trainers, placement facilitation, specialized programs for industries, aser coordination with existing training institutions dena lir ta paisa metetdaksü.

Iba ajanga COLTE ya training institute ka dang nungi tongtipangba akümer aser iba ajanga asen lanurtem o industries nüngdakba sendakteptsü ta Moatoshi-isa shisem.

Iba Centre ya Rev. C. Lima-i meshiteta sarasadem, Chief Executive Officer, Logistics Sector Skill Council (LSC) Ravi Yamarthy-i facilities sayua senzü.

NOHP cum Oral Cancer Screening Orientation sentong agi



Commissioner & Secretary, H&FW, Kevilenuo Angami, ketdangpur aser sentong nung ateneritem noksa angur.

Dimapur, Rongjui/Sept. 11 (TYO): Dr. K & T Kreditsu Foundation ajanga Dental Department, NHAK aser Department of Health & Family Welfare, Nagaland den lungjemer TANUH -AI Centre of Excellence, aser Dept of Electrical Communication Engineering, Indian Institute of Science, Bengaluru, Biocon Foundation and Foundation of Head & Neck Oncology teyari nung National Oral Health Programme (NOHP) indang Annual State Review Meeting cum Oral Cancer Screening Orientation aser Hands-on Training Programme ka September 10-11, 2026 anogotem Auditorium Hall, Naga Hospital Authority Kohima (NHAK) nung ayongzüka liasü.

Sentong tenzüka Addl. Director (Dental), Dr. Reyosalu Lase-i sarasadem aser Managing Director, NHAK, Dr. Ruutuou Sorhie-i pela agizükba o jembi.

Principal Director, Dr. Keveduyi Theyo; Director (Dental), Dr. I. Arenla Walling aser Managing Trustee, Dr. K&T Kreditsu Foundation, Dr. Toshevi Kreditsu Sema nungeria o tatsütsü jembia liasü.

Sentong akhumdong, Commissioner & Secretary, Health & Family Welfare Department, Kevilenuo Angami-i jembidang, Oral health ya general health nung tongtipang shilem ka sernung

state nung kanga senzuka yutsür, ta ashi.

Tebang nung tashidak adokba nungi kumzüka ayutsü, aziüoktsü aser anepalutsü atema sentong tajung nungdaka liaka awareness agütsüba, jenbua aliba, keraa putetba aser anepaluba tsütsü tawa tulu lir, ta lai ashi.

Lai oral cancer ya tebilemtsü tulu kumogo ta ashi aser oral cancer adokdaksüba nung 'risk factors' aika lir, aser item rongnung moko achiba, talisa mokozi maliba moko, sali achiba, yi tali ajemba, oral hygiene shidak mamshiba, Human Papillomavirus (HPV) densema viral infection ya dena lir ta ashi.

Moko amshir tali akumba ya tebilemtsü tulu lir. Global Adult Tobacco Survey (GATS-2) nunga nisung tain aikati yimya balala nung moko achiba indang shia lir aser kasaji lanurtemia moko achir.

Arishi küm 13-15 tsüngta tanur aikati moko achiba indang Global Youth Tobacco Survey (GYTS), 2019 nung shia lir. Iba den tekolak aser tekong nung cancer tashidak atemba ya küm 10-15 tsüngta state nunga tebilemtsü tulu akumtsü, ta ashi.

Anungji asenoki awareness aser nokdangba kisung nung merangloki screening, keraa putetba, shidak tendagba, mapang shidak nung anepaluba nunga rangloksü nungdaker, ta Kevilenuo Angami-i ashi.

Health facilities balala nung aliba Dental Surgeons ajungai diagnostic aser biopsy procedures balala kanga junga angateta alitsü nungdaker, ta ashi.

Lai Dr. K & T Kreditsu Foundation aser talisa Dr. Keduovinuo dang iba sentong asangsang akumtsü asoshi temulungtetba tulu nung inyakba atema pelaba lemsatepa liasü.

Parnoki Health Units nung biopsy procedure balala inyakba nung Dental Surgeon tem indang shisatsü aser skill tajungba kümdaksütsü asoshi nungdakba rongsen aser teyari agütsüba nung bendanga agütsür aliba ya tenüngsang agütsütsü tetemsü lir, ta ashi.

Iba ama inyaksangshi ajanga healthcare system aser bendanga agütsüba partners tsüngta lungjemer aser healthcare mapa inyaker tashi itshidaktsütsü tongtipang ta sayur.

Tatem nung Angami-i state nung Dental Surgeons ajunga dang nungdakba skills aser shisatsü bushia iba maongka tajungtiba nung amshitsü, training nung shilem agitsü, ajangshibatem lemsateptsü, kati ka dak nungi angazüktsü aser pei aliba Health Units nunga oa inyaktü ayongzüka liasü.

Iba sentong nung Dr. Neingutunuo Angami, Sr. Dental Surgeon NHAK menden liasü aser Dy. Director (Dental) & SNO (NTCP), Dr. I. Simon Sumi-i melepzüng o jembia liasü.

AC Copper wire auyaba tebilemtsü JCF-i lemsatep

Dimapur, Rongjui/Sept. 11 (TYO): Tesem balala nung AC copper wire aser copper coil auyar tali akumba tebilemtsü Joint Council Forum ajanga sangdong ka nung lemsatepa liasü.

JCF-i ashiba agi, iba ama auyaba ya osetsüset akoksaba ken o kisung masü saka nüburttem temulung nung anisungzüik mongui akumer aser kija, businesses aser institutions asoshi senktsü jenti akoksar.

Item tatalokba nungya auyartem kisung masü saka 'organized chain' alitsü akok, ta parnoki ashi.

Anungji ketdangsür temi copper wires aser coils auyartem kisung bushisungdang mesüi nisungtem, scrap dealers, tetsungta nisungtem aser metetsümonga alir, riziunga ayur, belener mesüra aoyaba copper ayokba nung yariirtema kaktettsüla, ta JCF-i ashi.

Nüburttem aser nija meyong ki o jen kasa kumzüka ayutsüla aser iba ama mapa tamajung inyakba nung dena alirtem ozüng nung aliba ama shidak merenshitsüla.

Anungji tapet ketdangsür tem dang iba tebilemtsü nung temulung agüja nüburttemi tamang katettsüsa inyaktü aser ki o jen kumzüka ayutsü mera tem agitsü ayongzüker, ta JCF sangdong ajanga ashi.

State Water Informatics Centre lapokogo

Dimapur, Rongjui/Sept. 11 (TYO): Nagaland nung National Hydrology Project (NHP) kübok State Water Informatics Centre (SWIC) amenoka maparen inyakba osang Nagaland Angh-i metetdaksüogo, koba Department of Water Resources, Government of Nagaland ajanga ketdang asütsü.

SWIC yagi date-generating organizations aser departments

balala nungi State water resources data bendentsü aser National Water Informatics Centre (NWIC) ajanga renema aliba scheme ama inyaktü.

Iba Centre ya tang Department of Water Resources indang ketdangsür aser staff temi achayangtsü aser Superintending Engineer in-charge, NHP tekolak asütsü.

SWIC indang mapa ulushiba mapang nungdakba yari nübu

talila agütsütsü akok, ta sangdong ajanga ashi.

SWIC amenoka mapa inyaktü ya State Cabinet-i August 21, 2026 nü agizüka liasü. Ibai National Water Informatic Centre (NWIC) aser Water Resources Department, Nagaland tsüngt July 7, 2022 nü Memorandum of Agreement (MoA) zülutepba ama inyaker alitsü, ta sangdong ajangasa ashi.

Chümoukedima nung "Reform Utsav" tenzüksü

Dimapur, Rongjui/Sept. 11 (TYO): Temelenshi maparen nung shilem agitsü aser public services aser tongtipang infrastructure tajungba kümdaksütsü asoshi shisa lemsatepba nung nüburttemi shilem agitsü ajungmesoa linük ajunga nung ayongzükerba "Reform Utsav" tenzüksü, ta Deputy Commissioner, Chümoukedima ajanga sangdong ka nung metetdaksü.

Healthcare, water and sanitation, power supply, shisaliok, lenmang aser telecom tesendaktep densema tongtipang areas nung tebilemba, shisatsü aser tasa balala lemsateptsü nüburttem dang ayongzüker, ta Deputy Commissioner sangdong ajanga ashi.

Kasa mapang nüburttem dang tang timtem ajangshiba lemsateptsü aser sorkar

inyakyim aser public service delivery tajungba akumba nung yaritsüsa lenmangtem sayutsü ayongzüker.

Chümoukedima nung sorkar indang departments, offices, local bodies aser stakeholders temi nüburttem nem awareness agüja aser ajangshitepa iba inyakyim nung shilem agidaksütsü metetdaksüogo.

Reform Utsav ya October 2, 2026 nü tenzüksü aser December 2026 tatem tashi alitsü.

Deputy Commissioner, Polan John, NCS-i nüburttem dang iba sentong nung shilem agitsü ayongzüker aser nenoki shisa tajung agütsüba ajanga Reform Utsav 2026 ya sorkar inyakyim aser nüburttemi tajungba kümdaksütsü asoshi tetetzü tajung akaba sapang ka kümdaksütsü imlar, ta ashi.

Kohima nung azü tebilemtsü indang jembi



Dimapur, Rongjui/Sept. 11 (TYO): Kohima jila aser colony tem nung kibur maliba aser tazüokba makai senzüba azü tem tebilemtsü jembia senden ka Deputy Commissioner, Kohima indang chamber nung mena liasü.

Azü tem talenba akai sadema senzüba, azü-i nisung dak angoba, lenmang aser nüburttemi amshiba tesemtem nung azü tepok indokba tebilemtsü indang jembia iba senden amen.

Iba mapang azü kibur temi khuret angatettsü, azü indang jana yimya shidak amshia indoktsü aser azü tem junga aziüoktsü indang jembi.

COVID-19 wara metenzükdang Old Zoo anasa azü anepaluba tesem ka ketdangsüa liasü, saka aziü ola adokba atema nüburttemi ashishitepba sülen shibangtsüsa akum, ta Kohima Municipal Council (KMC) ajanga metetdaksü.

Iba tesem nung yua aliba azü tem kanga junga anepalua chiyongtsü shidak agüja liasü. Kibur temi pei meyong azü bushia arur dang parnok anepaluba asoshi sent era meshir azü bener yok aser kibur ashishi maruba azü tem adopt süa liasü, ta ashi.

Nüburttemi azü metsüba nokdanga ozüng mali, saka

tazüokba makai azü tem yimtung nung sadema mesenzüdaksütsü kibur khuret lir ta jembia liasü.

Azü anepalua ayuba tesem asendenshitsü, azü ajak vaccine agitsü aser registration asütsü nungdakba indang parnoki jembia liasü. Iba den azü kibur aser nüburttem nem azü junga anepalua amshitsü angatetdakja awareness agütsütsü tongtipang lir ta jembi.

Public health nung mera ka ama iba senden nung ki tonga vaccination agüja aser veterinary services agütsütsü lenmangtem bushitepa liasü.

Iba senden nung Society for Prevention of Cruelty to Animals (SPCA) ajanga tangatetba kar lemsatep, koba administration ajanga sangdongtsü aliba guidelines nung lokteptsü.

Dog shelter tesem melenshia lapokshitsü indanga jembi aser yimtung nung azü sadema senzüba mesüra timtem agütsüba azü tem indang osang nüburttemi agütsütettsüsa WhatsApp group ka lapoktsü mesüra helpline number ka amshitsü indanga jembia liasü.

KMC dang dog shelter tesem melenshia ketdangsütsü atema action plan ka September 17 tashinung agütsütsü nunglokja liasü.

Modi aser Putin nati linük ana tsüngda taliba amalitepa inyaktsü bangjem



September 11, 2026 nü New Delhi nung BRICS senden jakdang Russia Tir, Vladimir Putin aser Ato kilonser Narendra Modi na ajurutepba noksa nung angur.

New Delhi, Rongjui/September 11 (Agencies): Hokolbarnü New Delhi nung Ato kilonser, Narendra Modi aser Russia Tir Vladimir Putin na senden mena tenati 2030 küm tashi nungbo linük ana tsüngda küm ka nung shishilembabaji dollar sen billion 100 akümtsü atema jembi.

Tang Russia aser India na tsüngda küm ka nung shishilembabaji dollar sen billion 65 lir.

Lenir anatisa defence, energy, fertilizer supplies aser tongtimbang minerals sectors nung linük anati taliba amalitepa inyaktsü bangjem.

BRICS summit nung shilem agitsü atema Putin-i anogo asemnü India semdang. Hokolbarnü Putin New Delhi tonga aruba sülen ghonda ishika tsüngda Modi tena senden amen, iba sülen tena külemi gari ka nung Bharat

Mandapam complex-i ao. Tena senden amenba mapang nung Putin-i tongmelang agi Ukraine nung raraba tensa aser yimjung atema inyakba metetdaksü. Ajioda Modi-ia ken o jembiba ajanga mangatettep benteta tekeraba nung rara anentsü ajungshia liasü.

Tawa Astana nung SCO summit aliba mapang nunga Modi aser Putin na jurila senden ka mena liasü. Iba mapang nungji Modi-i Putin dang tekeraba nung rara anentsü ajungshi.

Lenir anatisa linük ana tsüngda shishilembaba, investment, energy aser fertiliser security atema amalitepa inyakba jenjang asadang.

Lenir anatisa defence tsütsü taliba amalitepa inyaktsü bangjem.

Senden tembangba sülen Modi aser Putin nati Bharat

Mandapam nung INNOPROM India exhibition semdang aser shilem agirtem den jembia liasü.

MEA-i, "Tir Putin-i 24buba India-Russia Annual Summit nung adentsü atema Modi Russia-i jaokogo. Ajioda Ato kilonseri agizükogo," ta metetdaksü.

Bihar nung tzü metsüng agi nisung lakh 46.88 dak tali kongshiogo

Patna, September 11 (Agencies): Hokolbar tashi nung Bihar nung tzü metsüng tensa ano tamajungba küma district 15 nung nisung lakh 46.88 kongshiogo.

Ganga ayong aser iba ayong nung yimokba ayongtem tesem aika nung tzü 'danger levels' nung yimdar aser ibaji ajanga ayongkümlen aliba tesem aika tzü agi metsüngbangogo, ta ketdangsertemi metetdaksü.

Disaster Management Department (DMD)-i, tang Bihar nung block 88 kübok gram panchayats 561 nung

BRICS senden sülen sorkari temeja Parliament senden ka ayongtsü

New Delhi, September 11 (Agencies): Tawa tzüngluruwa mongpu Parliament senden junga magiteti liasü, ajisüaka kanga tongtimbang bill ana agizüktsü atema sorkari BRICS senden tembangba sülen temeja Parliament senden ka ayongzüktsüa akok.

Sorkari Women's Reservation Bill aser Delimitation Bill tekeraba nung agizükner, ta sorkar osang ka ajanga metetdaksü.

"Temeja senden ka ayongzüktsüa akok. BRICS senden tembangba sülen sorkari iba atemaji telemtetba ka agitsü," ta sorkar osang ka ajanga metetdaksü.

Temeja senden ka ayongzük nunga sorkari Navratri benjung mapang nung ayongzüktsü, kechiyong iba benjung ya tetsür tsüngrem Durga külemba den sendaktepa lir, iba denji külemi iba bill ya tetsürtem nem tashi agütsütsü atema lir.

Delimitation aser Women's reservation den sendaktepa aliba Constitutional Amendment Bill agizüktsü atema sorkari

two-third majority nüngdaker. Taküm April ita nung 131st Constitutional Amendment Bill dak sendakba nung Delimitation Bill ya Women's Reservation Bill den külemi benoka liasü, ajisüaka Lok Sabha nung two-thirds special majority mengutetba ajanga iba bill magizükteti liasü.

Iba mapang nungji Constitutional Amendment Bill agizüktettsüsa BJP-i aniba NDA züngsem peria maliasü, ajisüaka yimtenren nung temelenshi aika adokba ajanga tangbo Lok Sabha aser Rajya Sabha naprongla nung NDA ano jenjang tajungba kümogo.

Special majority ji angutsü atema Lok Sabha nung MP 360 aser Rajya Sabha nung MP 164 votes nüngdaker.

Taküm May ita nung West Bengal Assembly elections nung Trinamool Congress-i tamakok anguba sülen BJP jenjang tajungba küma liasü.

Ano Tamil Nadu nunga DMK aser Congress teloktep raksaba sülen BJP-i Lok Sabha nung DMK MP 22 teyari bushir.

Baltara nung Kosi ayong, Khagaria nung Burhi Gandak ayong aser Digha, Gandhi Ghat, Hathidah, Bhagalpur, Kahalgaon aser Munger nung Ganga ayong tzü 'danger level' nung yimdar.

State tesem balala nung community kitchens 1,194 nung chiyungdaksür aser relief camp 15 nung nisung 11,225 jenokdaksür parnok nem chiyungtsü, medical teyari aser nüngdak balala agütsüdar.

Polythene sheets lakh 3.10 aser chiyungtsü takong packet 48,300 lema agütsüogo.

Tzümetsüng aliba tesemtem nungi nisungtem aienshidaksütsü aser kümzüktsü atema rong 1,922 amshidar aser kiset shiruru chiyungtsü seret 7,53,500 agütsüogo, ta DMD-i metetdaksü.

State tesem balala nung State Disaster Response Force (SDRF) team 27 aser National Disaster Response Force (NDRF) team 10 lemozükja kümzükba maparen inyakdar.



September 11, 2026 nü New Delhi nung External Affairs Minister S Jaishankar (ajichi) aser Uruguay Foreign Affairs Minister, Mario Lubetkin na senden amenba sülen tangokba noksa nung angur.

AXIS BANK



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI 12, 2026

Asen lima shia arudagi !

Asen lima nung asenok libaliru aser inyakyim nung kangasa ochimashi aliba agi tejashitsü, tesasatsü aser tamajung-tamajung ta angur dang ashi, asenok dak tangatetba tajung aliba agi inyakba mapatem reprangdangra asen lima mejungi raksaa oa aliba tesemtem karbo asenoki tanem-tanemi shia arudakja tajungba küma angur aser item rongnung asen lima arem aser asenok alidak ki anasa ozüsangnutem arua asaaa angashiba aser yimzüa anguba ya asütsü. Asenoki arem mapayui chitokba dang masü saka arem shiruru aser ozüsangnutema dena tapayua mapayui tepsetba aser kasetba ajanga arem nung shiruru mali akümba dang masü saka ozü olaa mangashi küm aika lia aruogo. Aji oda, arem shiruru aser ozüsangnutem ajak ya kati ka chia taküm alitsüsa yangluja lir, anungji, tatishitsü agi, kodang arem nung shitsü mesü melilir, keyi chiyongtsü mangur, anungji yimtaki adoka kiset shiruru aser nisung dena nguseta achir. Kasaji, kodang alilen ayazüba shiruru tilatem mesüra süngku melilir, ozütem chiyongtsü agi anünger aser ano kodang asenoki ozüsangnu samatsüdir, ali nung ayazüba shiruru tilatemji achir mali tali pokteter aser item jagi alu chitsür aser tashidak poktetdaksür. Iba amaji ano manga merila mali küma tepset nunga shiruru karbo chiyongtsü mangu timatemtsü, iba jagi tanü asüngbo tangatetba nung ramen tashidak nungi kümzüksü asoshi merila samatsütsü merangba sentong nunga merila kata mali küma samatsütsübo memeranger. Aji oda, ozü kata mali sama nungbo süngku achir malitsü, anungji süngkuji tali pokteta süngku jagi alu chitsütsü. Kasaji, ali nung süngku kata mali aküm nungbo, ozü atema chiyongtsü maka ozütemi alu chitsütsü. Item ajakji Tsüngrem teyanglusang sentong lir, kechiyong Pai alima nung ya kati ka yaritepa alitsü asoshi dang yanglu masü saka taküm shiruru aser ozü sangnu süli, süngjanglijang aser süngolemba süli, item ajakji kati ka chia taküm alitsü asoshi yangluba lir. Itemji mebilemdangi asenoki pentsü ozü tashi mapayui kaseter aser arem shiruru kata mali ajak samatsütsü meranger. Aji oda, ozü kisüng mali nung süngku dang masü saka per dena poktettsü aser iba jagi asenoksa timatemtsü. Atangji, tanübo asenoka tangatetba kati aruba angur aser prangbong apur shiruru aser ozüsangnu tanguba ajakbo metepset aser mekhasteti kümzüka toktsür. Iba jagi anepdang aser nikongtsütsü, temenungratsüka, alu, arem aser ki temeket nung ozü telok senzüba aser asaba angashir. Ibaji asenoki arem shia arudaksüba den külemi arem shiruru aser ozüsangnutem wazüka ayutsü asoshi tangatetba kati arutetba ajanga lir. Atangji, asenok ya shi achir kin aser shi rongnunga arem shisa tajungba, iba jagi asenoki kanga sapua achir. Ajsüaka, alima nung ya tanü asenok jangratema chiajemra ojang ta masü saka teti asüng atema bilema chia ajemtsübaji kanga tongtibang lir, Asenoki arem shiruru aser ozü sangnu samatsübaji parnok dang takoksa ajurur amai bilemer saka parnok kata mali samabaji asenok asoshibo lendong tulu lir. Iba tangatetbaji asenok rongnung maneni lemsateptsüla aser arem dang masü saka arem shiruru aser ozüsangnu wazüka ayutsüba mapa ya ozüng agi masü tangatetba agi inyaksüla.

OLEMSABANG

Tetsür mapa inyakertem anema alitsü atema

Source : Internet



Mapa inyaker tetsürtemi mapang timbaka pei kibong nüngdak, tanurtem reprangba, senden amenba aser ainlen senzüba densema mapa tapu balala aika inyaker. Mapa inyaker tetsürtemi nutrition aketba chiyungtsü tebur dang nungi balaka nüngdaker. Anungji temang anema alitsü asoshi chiyungtsü tajung achitsüji kanga tongtibang. WHO ajanga bushisüngdangba ka ajanga ashiba agi, nisung billion 1.62 jungnüa anemia agi shiranger aser timba ka tetsürtem aser tanurtem lir.

Anungji temang anema lia pei mapa inyaktettsü asoshi temang anepalutsüji kanga tongtibang.

Temang anema alitsü chiyungtsü kar:

Spinach : Iba chiyungtsü nung antioxidants, vitamins aser dietary fibres peria aliba ajanga anemia anema rarater. Ano broccoli, spinach aser lettuce amala süngoliotemji antioxidants lir aser Vitamin C keta lir. Item chiyungtsü ajanga temang touzük azüokba dang masü saka toxins den junga rarater aser tashitak aika nungi jenbudaktsür.

Entsü : Protein aketba chiyungtsü tajung rongnung entsü lir. Entsü temesüng nung riboflavin mesüra Vitamin B2 lir, aser ibaji ajanga temang cell junga mapa inyakdaksüba den külemi tashi agütsür.

Nuts : Temang aser temulungjang naprong anema alitsü asoshi nuts nung nüngdakba nutrients, vitamins, minerals, temo aketba acids aser dietary fibres lir. Anogoshia tekabu ka sünga nuts achiba ajanga cancer aser temulungjang tashitaktem nungi jenbua alitsü.

Temo aketba ang: Hopta nung khen Salmon, trout aser mackerel ang temelang ka achiba ajanga anemia nungi taneptsü angutsü.

Tzü : Tzü peria ajemtsüla. Tashitak balala nungi jenbua alistü asoshi anogo shia tzü marok 8 bosa ajemtsüla.

Pakistan nung studio ka mita aoba sülen Khristan producer ka samaogo



September 11, 2026: Hopta ka tejaklen Pakistan nung sepaitemi Khristan ministry partner ka indang underground recording studio ka mita aoba sülen Khristan producer ka samaogo, aser tang tashi pa kong aliar memetet.

Keys for Kids Ministries nungi Greg Yoder-i, sepaitemi iba studio mita aoba mapang nung parnok taginüba oset ajak bener ao aser tanüngba oset ajak raksatsü, ta metetdaksü.

Yoder-i, "Dollar sen 5,000 nungi 8,000 shi jenjang osettsüset raksatsüogo. Ajisüaka onoki pa (Brother Labib) atema dang tebilemtsü akar," ta metetdaksü.

"Pa kinüngtsü aser chirnurtem lir, anungji onoki pa atema kanga shisabulua bilemer," ta Yoder-isa metetdaksü.

Labib-i pa indang

underground studio nungji Dari, Urdu aser Pashto oshitem nung Khristan audio record sür produce süa liasü.

"Pai (Labib) onok aser onok indang partner FMI atema oshi tasen (Farsi) ka asoshi project ka inyaka liasü. Pai iba project teinyakdak mapang nung sepaitemi iba studio mita ao," ta Yoder-i ashi.

Farsi oshi nung Khristan audio adoktetra ibaji ajanga Keys for Kids Ministries-i kidanger linük Iran nunga mapa tenzüksü liasü.

"Adianu Labib teyari ajanga onoki Pakistan aser Afghanistan na nung Storyteller units 13,000 shi lemtsüogo aser kobi melii Iran nunga lemtsütsü liasü," ta Yoder-i ashi.

Yoder-i, "Item audio osettem ya onok atema kanga tongtimbang, kechiyong nisung teimbakati azüngtsü memetet,

anungji Laishiba rangben audio nung adokba ajanga item nisungtemi Laishiba ochi meteter. Iba ya parnok atema shi amai lir," ta ashi.

Yoder-i, "Adianu Labib atema sarasademjang aser pa region nung aliba FMI indang safehouse tonga otettsü atema sarasademjang. Par kibong nem tesünep agüjang ta sarasademjang," ta metetdaksü.

"Satan taküm lir aser satani tamakok ngudaksüner, ajisüaka nisung aika Khrista dangi aruba ajanga onok ministry takok ngudar," ta pai ashi.

Yoder-i, "Taküm January ita nungi tenzüka tang tashi nung Afghanistan nung Arogo tasen 23 tenzüksüogo, aser ibaji Keys for Kids Storyteller ministry aser onoki FMI den senteper inyakba ajanga lir," ta metetdaksü.

57buba GMA Dove Awards sentong Nashville nung October 6 nü agitsü

September 11, 2026: 57buba Gospel Music Association (GMA) Dove Awards sentong October 6 aonung Nashville nung aliba Bridgestone Arena nung ayongzüka agitsü.

Iba sentong nung shilem agitsüpurtem rongnung Anne Wilson, Chosen Road, Tasha Cobbs Leonard, Tauren Wells aser TobyMac nunger densema lir.

Iba sentong nung takok angurtem tenüng sangdonga sempet agütsütsüpurtem rongnung Anthony Brown, CeCe Winans, For KING & COUNTRY, Julie Chen Moonves, Karen Peck, Lisa Knowles Smith aser Sarai Rivera nunger densema lir.

Ano taküm GMA Dove Awards nungbo award tasen ka- Community Impact Award for Peace & Purpose agütsütsü. Iba award ya music industry dak alia mapa tajung inyakba atema agütsütsü. Iba award ya melungtet telok 'God Behind Bars' nem agütsütsü.

God Behind Bars telok yagi tepuokdak alirtem aser parnok kibongtem nem Yisu Khrista dak aliba teimla agütsütsü atema inyaker.

God Behind Bars-i linük tesem ajaklen tepuokdak alir nisung meyrjang aika den Khrista osangtajung

lemsatepa nütsüngsüba mapa inyaker. Parnok ministry ajanga tepuokdak alir aika taküm melenshiogo.

Emmy Award angusang, Julie Chen Moonves-i God Behind Bars nem iba award ji agütsütsü.

57buba Annual GMA Dove Awards ya Cantinas Arts Foundation den ayongteper ayongzüker. Iba sentong atema tickets ayok tenzükogo.

Iba sentong ya Hokolbar (October 9) aonung 7:30 ako nungi TBN aser TBN+ app ajanga reprangtettsü aser aonung 10:00 ako nungi SiriusXM The Message nung reprangtettsü.

Brazil nung nütsüng shilem 26bo Evangelical Khristanem lir

September 11, 2026: Brazil linük nung yimsü dak sendakba telok tulutibaji Evangelicals tanurtem lir, ta 2022 census ajanga bushitetogo.

Brazilian Institute of Geography and Statistics (IBGE) data ajanga ashiba agi, linük nung arrshi küm 10 nungi 14 tsüngdapur tanur shilem 31.6 bo evangelicals lir.

Brazil nung nütsüng shilem 80 dak temabo Khristanem lir,

ajisüaka iba linük nung yimsü sasep nung nütsüng züngya ya kanga melenshia dang alir.

Nütsüng million 213 aliba linük nung nütsüng shilem 26.9 bo (56 million) Evangelicals lir.

Linük nung nütsüng shilem 8.1 Pentecost Khristanem lir aser Baptists, Presbyterians aser Methodists senteper nütsüng shilem 3.2 lir.

Brazil nung denomination tulutibaji Roman Catholic liasü,

ajisüaka parnok züngsem tajemba-tajemba dang akümer. 2000 küm linük nung nütsüng shilem 74.4 bo Catholics liasü saka 2010 küm tashi nungbo shilem 65.5 dang aküm aser 2022 küm tashi nungbo million 100.6 dang aküm.

Ano külen Brazil nung yimsü kecha den-a sendaktepa maliba nütsüng million 16.4 kümogo.

ANOGO ABEN TSÜNGREM DEN

Ni masü saka Tsüngrem

*"Tsüngrem, Ne temeim yimlibilem koda senti;
"Aser nisung chirtemi Ne tashikang akhüm
kübok nung jenoker" (T. Ken 36:7)*

Tekong 1-4 nung Tsüngrem dak mamanger jaklaliro indang noksa janga- jangjaa sayur. Pa tepang o-tem tai aser tekülak, tajung inyakba shisatsü mali, tamashi yimya sayur aser temenen nung jajar, aser pai tamajung mesempar, item ajak ya tetenzük nung oren ka nung tatsü agi yamai ashir. "Tsüngrem tsübuba pa madang mali".

Tekong 5-10 nung ya Tsüngrem ajungba indang jembir. Tsüngrem dak amangertemi kodanga parnok sasa mulung lemteta malir saka parnoki tamajungjibo kümdanga mita alir. Temeshipurtem asoshibo teti Tsüngremji ajak Takoksang, ajak nung Alisang lir, saka tamajunger asoshibo taküm nungji Tsungrem yimli mali.

Tamajungertem teti temenen nung jajar. Saka Tsüngrem meimer nisungibo temenenji magizüker. Tamajungertemi parnok sasa asükümer saka Tsüngrem meimba nisungtemi Tsüngrem yimya jakla liru nung ajemdaker ajemalur.

China nung Zion Church yarir lawyer ka jenaogo



September 2 nü lawyer Ruth Wang Taiwan airport tonga aoba sülen tangokba noksa nung angur.

September 11, 2026: China nung communist sorkari Zion Christian Church anema inyakba mapang iba Arogo yaria arur lawyer kati China toktsür jena ogo.

China nung ketdangsertemi la dang VDoor Law Firm shibangang ta tuyuba den külemi la amokmerena liasü.

Yaküm October ita nung ketdangsertemi Zion Arogo nung pastor Ezra Jin densema züngsem 18 apuba sülen Wang-i aniba team-i iba Arogo nung züngsemtem atema ken o jembija liasü.

Ita ana tejaklen pastor Ezra Jin bo chiokogo.

Iba sülen ano pastor 9 chiokogo saka tang tashi nungi 8 bo jail nung lir.

China nung register masüba Arogo tulutem rongnung Zion Church densema lir. Iba Arogo nung züngsem 5,000 dak tali lir,

ajisüaka underground church ka ama yimti 40 shi nung parnoki nija kiojen, restaurants aser karaoke bars nung adenshia tekülem sentong agir.

Tamalena sorkari VDoor Law Firm anema inyaka liasü. Iba firm tenzüksangji Wang'er tesayur Zhang Kai lir. Tangbo iba firm license thinentsüogo aser Kai dang linük toktsür maotsü tetuyuba agüja lir.

Taoba ita Wang-i Japan semdangba mapang nung China yimtiba, Beijing nung ketdangsertem ajuruang ta ashi, ajisüaka lai tetsübu nung China-i maotsü telemtetba agia Taiwan-i jena ao.

"Tang ozü kibong kodamasüba tensa ka nung lir. Karibo onok jenokdaksütsü asü masüar mejangja. Ajisüaka Laishiba otsü nung Ruth yaritsü atema Tsüngremi Boaz yokba ama Tsüngremi kü nem-a iba ama nisung ka yoktsü ta ni amanger," ta Ruth Wang-i metetdaksü.

Tir Yimvim

* Ayongküm nung onoki am ampuamia lemer yangji külemi
chiyong.

All Assam Students' Union (AASU)-i September 11, 2026 nũ Tinsukia nung human-chain demonstration ka agiogo aser iba ya lenmang raksaa alibatem yanglushitsũ takhangba agũja agiba sentong ka liasũ. AASU-i Assam ajungalen lenmangtem kanga mejungi akũmba nenshitsu atema state ajungalen human-chain programme ayonga agi. Lenmang aika nung senzũsenbongertemi timtem kanga ajurur aser talisa iba ya tang teyangludak national highway nung lir ta AASU-i ashi.

OFFICE OF THE

NOKPU VILLAGE COUNCIL

P.O. MANGKOLEMBA , B.P.O. LONGCHEM

DIST. MOKOKCHUNG: NAGALAND

SANGDONGER

Tzürabur mapang nungi akhüm agüja wazüka tokt süba " Mangkolemba " tenüng tetshia tanga tesem nung " Multi Purpose Hall " yangluba atema Khar Yimden-i kechi tashishiba yimyim agütsüogo, iba ken O nung Nokpu yimden-ia tashi agi nungiter, aser yamala asen Aoer sobaliba nung maliba mapa; tangar putu yimli dak kongshia inyakba, khü-khüa aitsür. Iba ken O tatembang kati maru tashi Nokpu yimden, Khar yimden den tena lir ta sangdonger.

Sd/-

I. Sashimeren Ao

Chairman

Nokpu Village Council

Sd/-

Imnasubo Longkumer

Secretary

Nokpu Village Council

DR Congo school kitsük-kirong lendong nung tanur 20 dak tema asü



Bukavu, Rongjui/Sept. 11 (Agencies): Democratic Republic of Congo anüdoklen sorkar anemba teloki agia aliba Bukavu nung aliba school ana nung mi adokba nungi jena aotsü merangba mapang kaketshir 24 ajemset, ta yangji aliba ketdangsür temi ashi.

Iba lendong nung nisung tain-a asü ta ashir aser nisung aika aliba Kadutu tesem nung asür ya timba akumtsü akok ta shisabolur.

Takum jenburtem anasa aliba mozüki temi anir ao aser iba tesem nung tangokba video tem nunga tanurtem mozüki atem nung kangshia mejanga aliba nguogo.

Iba kitsük-kirong lendong nung ki 300 shi rongdokogo, aser mi ya kechi ajanga adokar mejangja.

Sorkar anemer temi shimba ketdangsür temi Brehostibar nikongdang sangdong ka nung nisung 24 asüba metetdaksüogo, saka yangji nisung timba süa alitsü südi ta bilemer.

Social media nung noksa tem lemsatepba nunga tanurtem ali nung marakzüi mejanga aliba nguogo.

Mi ya nikongdang tashinung remseptet saka tang tashi mokozü alongtar, ta tenük kuli alir kati ashi.

Bukavu ya South Kivu

province yimtiba lira ser DR Congo nung nisung nütsüng yongsük timtiba aliba tenemtsüng nung yimtitem rongnung ka lir, koba taoba küm February ita M23 teloki agia liasü.

Kasa mapang Kinshasa nung aliba sorkaria sangdong ka X nung lemsatepba liasü saka nisung asü-amaba osang tejangja magütsü.

"Iba kitsük-kirong lendong asoshi Ministry of National Education and New Citizenship ajanga mangyim tejashi lemsateper," ta ashi.

"Nisung aika taküm samaba den külemi aika yiruogo aser iba lendong nung takoksa ajurubatemji tang tashi nungbo mejangja lir. Minister-i asür kibongtem den asükhu lemsateper ta ashiba den külemi takoksa ajuruba school tem nung maneni shisaliok agütsütsü atema asadangtsü asoshi tetuyuba agütsüogo."

Taoba hopta tatemlen Kinshasa nunga iba mesük kitsük kirong lendong ataloka kiyimba sentong ka nung nisung aika ajemset.

Iba sülen sorkari nüburtem kumzüka ayutsü mera tesashi agütsü aser lokti adenshiba tesemtem nung ozüng amshitsü asoshi linük tesem ajunga nung ketdangsürtem yoka lir.

Houthi teloki Yemen tzükum agir, Saudi totzü asoshi tebilemtsü akar

Cairo, Rongjui/Sept. 11 (Agencies): Iran den sendaktepa aliba Houthis temi Brehostibarnü Yemen rongnendak Mocha yimti agiogo aser Red Sea tzükumlen tongtipang asetkong tem leni otar, ta mitkar osangtem ajanga ashi. US Tir Donald Trump-i Iran rara ya US midterm elections sülen tembangtsü imlar ta shir ghonda ishika lir iba ya atalok.

Yemen sorkari indang mitkar osangtem ajanga ashiba agi, Houthis teloki Bab el-Mandeb Strait amokbangtsü tashi ngutetogo aser Hanish asetkong tem tongogo. Bab el-Mandeb Strait ya Red Sea south tsütsü tepang nung lir aser alima nung rong senzüba lenmang tongtipangtiba rongnung ka lir.

Houthis temi Strait of Hormuz nungi külen Arabian Peninsula tsütsü tzü lenmang ya azüoktetra, ibaji parnok bhukumer Iran asoshi United States den raraba nung tajangzük tulu agütsütsü, rong senzüba tongtipang lenmang tanabuba nung supplies ajema akumtsü aser totzü jenjang timba ang akumtsü.

Ibaji ajanga ano Trump asoshi rara nungi ainshitsü asoshi lenmang bushitsü tasakba akumtsü, koba ajanga November midterms atongtsü lia par Republican Party teimla mejungi akumer.

Yemen indang Houthi-i lapoka aliba humanitarian operations coordination centre ajanga sangdong ka nung Red Sea nung Saudi nunger rong dak alaka shipping company ajunga senzütettsü ta ashi.

Iran rara mechi alima nung totzü shilem 20 abenba Hormuz

shibangba sülen alima nung totzü timtiba ayokba linük, Saudi Arabia ya Red Sea lenmang nung metaloka aru.

Yemen sorkar indang mitkartem aser par tembartem Red Sea tzükum len Bab el-Mandeb Strait nung aliba Dhubab aser Perim Island leni aor, ta sorkar indang mitkar osang ajanga ashi.

Strait amokbangtsü atema Dhubab aser asetkong ya agitsü tongtipang lir ta parnoki ashir.

U.N. Special Envoy for Yemen Hans Grundberg-i Brehostibarnü UN Security Council senden nung Yemen indang jembidang, Yemen rara nung phase tasenba aser lendong tuluba ya alimai angateta anendaktsütsüla, ta shia liasü.

Houthis temi Mocha amokbangtetba ajanga alima nung tongtipangtiba strait nung parnok aliba sayur aser tzüyim nung rong senzütsü atema tebilemtsü tulu adokdaksür, ta pai ashi.

Iba senden nung US representative Jenifer Neidhart de Ortiz-i Houthis ya Iran indang agents aser hadir ka ama inyaker ta aitsü.

"Tensa tamajungba akumba ya magizükteter, aser shirnoki iba timtem adokdaksür, parnoki khuret abentsü," ta lai ashi.

Iran indang foreign ministry ajanga sangdong ka nung, mokdangba mesüra Houthis anema mitkari inyaksangshiba ajanga Yemen rara manentsü, anungji jembishinü akatsüla, ta ashi.

Tan hopta Houthi nungertem tzükum leni arutetba ya Iran indang Revolutionary Guard Corps teyari nung lir, ta Yemen

sorkari, Iranian aser region nung osang balala ajanga ashir.

Houthi odongtar Mohammed Abdulsalam-i, par telok operations ya defensive lira ser Yemen nung amakba anenba sülen parnoka anentsü, ta ashi.

Supply lenmang nung timtem alitsü tetsübo nung Brehostibarnü Brent crude jenjang shilem pezü timba kuma barrel ka nung sen \$105 agi yoka liasü aser tang mezüngbuba US nung diesel jenjang gallon ka nung sen \$6 dak tema meshir, ta price tracker GasBuddy ajanga ashi.

Houthis yagi March ita Israel nung maka rara nung adenba sülen July ita Saudi Arabia indang rong tem mokdangba sangdong aser tan ita tali tesashiba amaker.

Region nung tensa kanga mejungi lir, kong Saudi civil defence ketdangsür temi linük southwest tsütsü Khamis Mushait yimti nung ghonda 24 tsüngta pezüben buba 'emergency alerts' sangdong, kechiaser Houthis temi yangji amaker.

Houthis temi tensa tamajungba kumdaksüba anendaktsü Saudi Arabia-i Iran dang shiokba osang Pakistan-i shiogo ta Saudi, Pakistan aser Iran osangtem ajanga ashi.

"Iran-i Houthis mazioker" ta Tehran-i langzüogo, ta Iran ketdangsür kati ashi.

Tehran rara nung amshiba sen ajemdaktsütsü nükjidong nung tenzükba "Operation Economic Outcast" nung shilem ka ama US Treasury Department-i Brehostibarnü Hezbollah aser tanga Iranian proxies yariba firms aser kija nem sanctions tasen agütsüogo.

Swiss Alps nung bus ka tsükok, nisung pongu asü aser aika yiru



Geneva, Rongjui/Sept. 11 (Agencies): Swiss Alps south-east tsütsü tourist tem mena aliba bus ka tsükokba lendong nung nisung pongu asü aser aika yiru, ta police temi ashir.

Brehostibar nikongdang Susch aser Zernez tsüngta Dutch tour bus yagi lenmang yangluba tesem ka nung safety barrier nung atsük aser lenmang nungi mekazüka alu.

Swiss police temi asürtem ano mejangjateti lir, ta Hokulbarnü shiogo.

Iba lendong nungya bus nung mena alir nisung 40 yiru aser parnok ya rescue helicopters aser ambulance ajanga mozüki

balalai belenshia anepalutar ta ashi. Iba bus ya Hombarnü Netherlands nungi ayameso aser Austria nungi Switzerland-i anogo ka atema arua senzüba mapang lendong ya atalok.

Dutch Ato Kilonser Rob Jetten-i lendong ajurur alir ajunga asoshi sarasademtsür ta ashi aser King Willem-Alexander aser Queen Maxima natia kasaji lemsatepogo.

Swiss Tir Guy Parmelin-i X nung iba lendong ajanga pa kanga aoksa ta ashi aser asür kinungertem den asükhu lemsatep.

Iba lendong nung nisung asem kanga sashia yiru, ta

Graubünden cantonal police ajanga ashi.

Lendong ajurur alirtem kumzükba aser yariba maparen nung Switzerland aser Austria nungi helicopters tenet den fire departments aser Plaiv road rescue service temi yaritepa liasü ta ashi.

Graubünden indang public prosecutors aser police temi iba lendong atalokba bushisüngdang sütar.

Swiss National Park ya Alpine reserve tuluka tenem agi sünga aliba Engadine telemok tashi 100 sq km dak tema lir aser iba tesemi aitsü atema Zernez ya entry point lir.

Gifty Jami-i India tenüing nung World Nomad Games nung shilem agi



Kohima, Rongjui/Sept. 11 (TYO): Nagaland nungi Mhayibeni Gifty Jami ya Naga nunger saisaponger rongnung India tenüing nung VI World Nomad Games nung Intellectual Strategy Games category nung mezüing shilem agir kumogo, koba Issyk-Kul, Kyrgyzstan nung August 31 nungi

September 6, 2026 tashi liasü. Jami-i Toguz Korgool nung shilem agi, koba traditional Central Asian board game ka lir aser yangji lai Turkey, Morocco, Mongolia, United States, Sweden, Malaysia, Cabo Verde aser Burundi nungi arurtem den toktepa liasü. La individual competition

nung jenjang 27 buba nung tembang aser jenjang 17 buba nung tembangba Indian team nung la dena liasü. India ya South Korea den kasa jenjang nung tembang, kong linük 48 nungi saisaponger 133 arua shilem agi, ta All India Traditional Wrestling & Pankration Federation (AITWPF) tir Omar Mukhtar Tamboli-i sangdong ka nung ashi.

Intellectual Strategy Games category nungya Toguz Korgool, Mangala aser Oware densema traditional board games tem liasü aser iba tetoktepba nungya shilem agir indang tasa, temulung agütsüba, calculation, precision aser telemtetba agiba tendanga liasü.

Jami-i shilem agiba ya Nagaland asoshi mezüingbuba alitsü, aser India tenüing nung World Nomad games nung Intellectual Strategy Games nung shilem agir Naga nunger mezüingbuba alitsü, ta pai ashi.

NCA-i anogo pezü Umpire Course agiogo

Dimapur, Rongjui/Sept. 11 (TYO): State nung cricket asaya ketdangsüba tali tashi itshitsü aser terenlok alitsü nükjidong nung Nagaland Cricket Association (NCA) Iba course ya BCCI qualified ajanga Nagaland Cricket Academy, Sovima nung September 7-10, 2026

anogotem Umpire Course agia liasü. Iba court nung Nagaland kübok district balala nungi candidates 25 arua shilem agia liasü. Iba course ya BCCI qualified umpire, Jayapal P-i agia liasü, shibai course nung shilem agirtem dang cricket umpiring

nung technical aser practical yimyatam sayua liasü.

Anogo pezü sentong nungya shilem agir nem Laws of Cricket, umpiring yimya, telemtetba agiba, asaya tensa aser asaya ketdangsür teinyaktsütem angatetdakja liasü.

India den asayatsü aliba Brazil squad nung Vinicius Jr densema lir



Rongjui/September 11, 2026 (Agencies): October ita India den FIFA international friendly ka asayatsü aliba Brazil squad nung Real Madrid nungi nüngtugu asayar Vinicius Junior-a densema lir, shibai FIFA World Cup nung Brazil atema goal pezü idakja liasü.

FIFA World Cup pongu koker aliba Brazil team ya India tebur football team den Kolkata nung October 3 nü asayatsü. Asaya ya Salt Lake Stadium nung asayatsü.

Brazil head coach Carlo Ancelotti-i, Brazil international friendly asayatem atema September 9 nü asayar 26 tenüing sangdongogo. Vinicius den külemi squad nung Real Madrid nungi Endrick,

Barcelona captain Raphinha, aser Arsenal midfielder Bruno Guimaraes nungera densema lir. Parnok asemprongla ya Brazil indang FIFA World Cup 2026 squad nung densema liasü.

Chelsea forward Joao Pedro shiba FIFA World Cup atema meshim pa squad nung züngoksemogo aser pa den Arsenal defender Gabriel aser PSG captain Marquinhos nata shimogo. Ajisüaka Liverpool goalkeeper Alisson Becker, Manchester United forward Matheus Cunha, Al Hilal nungi Gabriel Martinelli, Inter Miami nungi Casemiro aser Trabzonspor nungi Fabinho nunger squad nung mali.

Brazil team ya September ita Australia nung international

friendly asaya ka ana asayatsü aser iba sülen India-i arua Kolkata nung asayatsü.

Australia aser India na den international friendly asaya atema Brazil squad:

Goalkeepers: Hugo Souza (Corinthians), Pedro Morisco (Coritiba), Otávio (Cruzeiro)

Defenders: Arthur Dias (Athletico-PR), Douglas Santos (Zenit), Gabriel Magalhães (Arsenal), Jair (Nottingham Forest), Marquinhos (PSG), Matheuzinho (Corinthians), Mauro Junior (PSV Eindhoven), Vitor Reis (Manchester City), Wesley (Roma)

Midfielders: Andrey Santos (Manchester United), Breno Bidon (Corinthians), Bruno Guimarães (Arsenal), Danilo Santos (Botafogo), Douglas Luiz (Juventus), Gabriel Bontempo (Santos)

Forwards: Endrick (Real Madrid), Estêvão (Chelsea), João Pedro (Chelsea), Pedro (Flamengo), Raphinha (Barcelona), Rayan (Bournemouth), Samuel Lino (Flamengo), Vinícius Júnior (Real Madrid).

India den asayatsü aliba Brazil squad nung Vinicius Jr densema lir

Rongjui/September 11, 2026 (Agencies): October ita India den FIFA international friendly ka asayatsü aliba Brazil squad nung Real Madrid nungi nüngtugu asayar Vinicius Junior-a densema lir, shibai FIFA World Cup nung Brazil atema goal pezü idakja liasü.

FIFA World Cup pongu koker aliba Brazil team ya India tebur football team den Kolkata nung October 3 nü asayatsü. Asaya ya Salt Lake Stadium nung asayatsü.

Brazil head coach Carlo Ancelotti-i, Brazil international friendly asayatem atema September 9 nü asayar 26 tenüing sangdongogo. Vinicius den külemi squad nung Real Madrid nungi Endrick, Barcelona captain Raphinha, aser Arsenal midfielder Bruno Guimaraes nungera densema lir. Par asemprongla ya Brazil indang FIFA World Cup 2026 squad nung densema liasü.

Chelsea forward Joao Pedro shiba FIFA World Cup atema meshim, pa squad nung züngoksemogo aser pa den Arsenal defender Gabriel aser PSG captain Marquinhos nata shimogo. Ajisüaka Liverpool goalkeeper Alisson Becker, Manchester United forward Matheus Cunha, Al Hilal nungi Gabriel Martinelli, Inter Miami

nungi Casemiro aser Trabzonspor nungi Fabinho nunger squad nung mali.

Brazil team ya September ita Australia nung international friendly asaya ka ana asayatsü aser iba sülen India-i arua Kolkata nung asayatsü.

Australia aser India na den international friendly asaya atema Brazil squad:

Goalkeepers: Hugo Souza (Corinthians), Pedro Morisco (Coritiba), Otávio (Cruzeiro)

Defenders: Arthur Dias (Athletico-PR), Douglas Santos (Zenit), Gabriel Magalhães (Arsenal), Jair (Nottingham Forest), Marquinhos (PSG), Matheuzinho (Corinthians), Mauro Junior (PSV Eindhoven), Vitor Reis (Manchester City), Wesley (Roma)

Midfielders: Andrey Santos (Manchester United), Breno Bidon (Corinthians), Bruno Guimarães (Arsenal), Danilo Santos (Botafogo), Douglas Luiz (Juventus), Gabriel Bontempo (Santos)

Forwards: Endrick (Real Madrid), Estêvão (Chelsea), João Pedro (Chelsea), Pedro (Flamengo), Raphinha (Barcelona), Rayan (Bournemouth), Samuel Lino (Flamengo), Vinícius Júnior (Real Madrid).

Australia A den asaya atema squad nung Pandya züngoksemogo

New Delhi, Rongjui/September 11 (Agencies): India tebur cricket selection committee-i, Australia A deb Puducherry nung asayatsü aliba asayamung atema India A squads sangdongogo. Iba asayamung nung multi-day ana aser ODI asem asayatsü. Mezüingbuba multi-day match ya September 22 nungi 25 tashi asayatsü.

Devdutt Padikkal lenisüba nung multi-day team ya asayatsü aser Sai Sudharsan vice captain asütsü. Squad nung batter Aman Mokhadde, Ayush Pandey, Yash Rathod aser Shaik Rasheed nunger densema lir aser Kumar Kushagra aser N Jagadeesan na wicketkeeper asütsü.

Multi-day squad nung ano Shams Mulani, Tanush Kotian, Tushar Deshpande aser Anshul Kamboj nungera densema lir.

ODI asayamung indang aptain Ruturaj Gaikwad asütsü aser Padikkal vice-captain asütsü. Sai Sudharsan, Rajat Patidar, Priyansh Arya, Nishant Sindhu, Arshin Kulkarni, Arshad Khan, Naman Dhir, Hardik Pandya*, Prabhsimran Singh (WK), Gurjapneet Singh, Yash Thakur.

nung densema lir. India nunger all-rounder Hardik Pandya one-day squad nung züngoksemogo, saka pa temang tajungba kümer ali nung dang asayatetsü.

Multi-day asaya ana ya September 22-25 aser September 29- October 2 tashi asayatsü. ODI asem ya Puducherry nung October 6, 9 aser 11 nü asayatsü.

India A Multi-day squad: Aman Mokhadde, Ayush Pandey, Devdutt Padikkal (C), Sai Sudharsan (VC), Yash Rathod, Shaik Rasheed, Kumar Kushagra (WK), Shams Mulani, Tanush Kotian, Tushar Deshpande, Anshul Kamboj, Praful Hinge, N Jagadeesan (WK), Nachiket Bhute, V Vyshak*.

India A One-Day squad: Ruturaj Gaikwad (C), Devdutt Padikkal (VC), Sai Sudharsan, Priyansh Arya, Rajat Patidar, Kumar Kushagra (WK), Nishant Sindhu, Vipraj Nigam, Arshin Kulkarni, Arshad Khan, Naman Dhir, Hardik Pandya*, Prabhsimran Singh (WK), Gurjapneet Singh, Yash Thakur.

BILEMDANGANG

"Nü tenük agi anguba tashi oang; kodang na aji tongdir, nai talangba angutsü."